

騰身而舉已往木杪因此飛昇而去

廣記許宣平新安歛人也景雲年中隱於城陽山南塢或負薪以賣每醉吟曰負薪朝出賣沽酒日西歸路人莫問歸何處穿白雲行人翠微

費公石墨耿女雪銀

茅山記費長房遇壺公得其術書符行於世寓茅山之東書符救人有功一日出山傾硯水於石澗中其石變黑因號爲石墨至今取其墨亦可書符

女仙傳女冠耿先生者耿謙之女嘗因大雪令宮妓以金盤貯雪搗爲銀錠投洪鑪中須臾成金指痕猶在又異人錄云先生取雪實之削如銀錠投熾炭中及冷爛然爲錠銀矣

虛寂馬鳴大亮牛喘

高道傳舒虛寂字得真居新繁銅馬觀常與人言昔黃帝與甯先生天真皇人眾真會於此號其地爲三會臺有銅馬隱於林間今龍橋乃其舊迹後人於銅馬隱處築臺以誌之秋夕澄霽忽銅馬騰躍嘶鳴見之者得道虛寂居此三十年幸一見之一日忽謂鄰母曰旦夕將他適欲以後事爲託因指示其地囑曰瘞我於此當深三尺餘吾必有厚報是夕卒鄰母如其言而瘞之果得金一鎰以聞官驗所瘞但杖屨而已仙傳拾遺馮大亮家貧好道亦無所習每遇道士及方術之

道藏輯要

三洞羣仙錄

奕

翼集四
XOJ二